



Lëtzebuerg, den 28te Februar 2020

Communiqué: Gratis öffentliche Transport: Jo – Stellenofbau: Nee

D’Pirate stinn zënter 2013 fir d’Aféierung vun engem öffentliche Transport ouni Ticket a begréissen dofir d’Mesure ab dem 1te Mäerz de gratis öffentliche Transport anzeféieren. D’Ëmsetzung vum gratis Transport däerf awer a kengem Fall zu Schued vum Transportpersonal goen an net zu engem Stellenofbau féieren. No Äusserunge vun der DP op Facebook wëllen d’Pirate vum Minister ee kloert Bekenntnis, dass de gratis öffentliche Transport net zu engem Stellenofbau féieren däerf.

Fir eis PIRATEN stellt d’Mobilitéit ee Grondbesoin duer, fir aktiv un der Gesellschaft kënnen deelzehuelen. Fir eis ass den öffentliche Transport ee Service, un dem all Bierger an engem Land muss kënnen deelzehuelen. D’PIRATEN schwätzen sech schonn zënter Jore fir d’Aféierung vum Gratis Öffentlechen Transport (GET) aus an ënnerstëtzen aus dësem Grond och de Projet vun dëser Regierung. Mir si frou, dass d’Regierung, no all de Joren voll Widderstand a Kritik, am Joer 2019 eis Fuerderung opgegraff huet an elo endlech ëmsetze wäert. D’Regierung huet agesinn, dass de GET eng wierklech gutt Measure ass.

Obwuel mir mat der Aféierung vum GET mat der Regierung op enger Linn sinn, si mir awer net domadder averstanen, wéi d’Changementer bei der CFL duerchgefouert ginn, well dës weder am Interessi vum Guichetspersonal, nach vum Client sinn. Et handelt sech an eisen Aen ëm eng reng Spuermoosnam zum Nodeel vum Client an dat obwuel de Minister an der Vergaangenheet ëmmer erëm betount huet, datt et am Kader vum GET zu kenge Spuermeasure komme sollt.

Nodeems schonn am Summer 2019 de Minister Bausch annoncéiert huet, dass wéint dem gratis öffentliche Transport CFL-Guicheten sollen zougemaacht ginn, huet elo déi demokratesch Partei (DP) op de soziale Medien nach eng Kéier dovunner geschwat, dass den GET duerch d’Ofschafe vun de Kontrollen kompenséiert géif ginn. Implizitt klängt dat, wéi wann e Käschenofbau duerch een Ofbau vum Personal geplangt wär.

Et gouf awer bis elo vum Minister behaupt, dass mat der Aféierung vum gratis öffentliche Transport keng Persoun hier Aarbecht wäert verléieren. D’Pirate ënnersträiche nach eng Kéier, dass d’Aféierung vum GET op kee Fall duerch ee Stellenofbau däerf kompenséiert ginn. Dës widdersprécht eiser Grondiddi vum öffentliche Transport ouni Ticket, wéi mir e schonns zënter 2013 fuerderen.